



**ODLUKA**  
**O PROVOĐENJU REGULACIONOG PLANA**  
**„KVADRANT C - MARIJIN DVOR “**  
**(Prijedlog)**

**Nosilac pripreme Plana:**  
Gradonačelnik

**Nosilac izrade Plana:**  
Zavod za planiranje razvoja  
Kantona Sarajevo

**Obradivač:**  
Služba za urbano planiranje, investicije,  
stambene i komunalne poslove

**Sarajevo, juli 2026. godine**

Hamdije Kreševljakovića 3, 71000 Sarajevo, Bosna i Hercegovina  
T: +387 (0)33 21 89 96; (0)33 21066 59; F: +387 (0)33 20 83 41  
E: pisarnica@sarajevo.ba  
[www.gradskovijece.sarajevo.ba](http://www.gradskovijece.sarajevo.ba)





Na osnovu člana 177. Zakona o prostornom uređenju Kantona Sarajevo („Službene novine Kantona Sarajevo“, broj 24/17 i 1/18), te člana 18. stav (1) tačka d) i člana 31. stav (1) tačka b) Statuta Grada Sarajeva („Službene novine Kantona Sarajevo“, broj 7/23), Gradsko vijeće Grada Sarajeva, na \_\_. sjednici održanoj dana \_\_. \_\_. 2026. godine, donijelo je:

**(Prijedlog)**

## **ODLUKU O PROVOĐENJU REGULACIONOG PLANA „KVADRANT C - MARIJIN DVOR“**

### **Član 1.**

Ovom Odlukom utvrđuju se uslovi korištenja, izgradnje, uređenja i zaštite prostora i način provođenja Regulacionog plana „Kvadrant C – Marijin Dvor“ (u daljnjem tekstu: Plan), a naročito granice prostorne cjeline, urbanističko-tehnički uslovi za izgradnju građevina, uslovi za uređenje građevinskog zemljišta, uređenje zelenih i slobodnih površina, te odnosi prema postojećim objektima.

### **Član 2.**

Granica obuhvata polazi od tačke br.1 koja se nalazi na parceli k.č. 4359, a ima koordinate  $y=6532009$ ,  $x=4856569$ , zatim produžava na sjever sijekuci u pravoj liniji parcele k.č. 4359 i 4339/1, te iduci međom parcele k.č. 3378/1 (obuhvata je) dolazi u tačku br.2 koja se nalazi na parceli k.č. 4306, a ima koordinate  $y=6531975$ ,  $x=4856718$ . Granica obuhvata nastavlja na sjeveroistok iduci putem k.č. 4306 i dolazi u tačku br.3 koja ima koordinate  $y=6532668$ ,  $x=4856873$ , lomi se u pravcu juga sijekuci u pravoj liniji parcele k.č. 4338/1, 3361/2, 3361/3, 3369/8, 3369/15, 4339/1, 4359 i dolazi u tačku br.4 koja se nalazi na parceli k.č. 4359, a ima koordinate  $y=6532681$ ,  $x=4856645$ , potom produžava na jugozapad iduci desnim koritom rijeke Miljacke (ne obuhvata je) k.č.4359 i dolazi do tačke br.1, odnosno do mjesta odakle je opis granice i počeo. Sve gore navedene parcele nalaze se u K.O. Novo Sarajevo I, Općina Novo Sarajevo. Površina obuhvata Plana iznosi  $P=14,6$  ha.

### **Član 3.**

U obuhvatu Plana definirane su zone sa sljedećim namjenama:

|                                               |                       |
|-----------------------------------------------|-----------------------|
| - zona obrazovanja (srednje i visoko)         | 34.515 m <sup>2</sup> |
| - poslovno - stambena zona                    | 21.320 m <sup>2</sup> |
| - poslovna zona                               | 8.115 m <sup>2</sup>  |
| - zona kulture                                | 12.640 m <sup>2</sup> |
| - zona diplomatsko-konzularna predstavništva  | 7.600 m <sup>2</sup>  |
| - zona zelenila - aleja „Vilsonovo šetalište“ | 23.896 m <sup>2</sup> |
| - zona javnih površina i trga                 | 14.646 m <sup>2</sup> |
| - zona saobraćajnih površina                  | 23.268 m <sup>2</sup> |



#### Član 4.

Urbanističko tehnički uslovi za izgradnju građevina:

- građevinske parcele utvrđene su regulacionom linijom i definirane u grafičkom dijelu Plana;
- građevinska linija utvrđuje dio građevinske parcele na kojoj je moguće izgraditi građevinu, u sklopu koje se može formirati tlocrtno rješenje objekta, a istu ne može preći najistureniji dio objekta;
- planom utvrđene građevinske parcele, moguće je, zavisno od potrebe potencijalnih investitora spajati, pri čemu se ne može mijenjati planirani saobraćajni koncept, regulaciona linija i utvrđena distanca građevinskih linija u odnosu na saobraćajnice;
- priključke na saobraćajnice i mrežu komunalnih instalacija treba u svakom konkretnom slučaju posebno projektovati, a u skladu sa Planom i važećim normativima za predmetne vrste priključaka;
- uređaji koji su u funkciji obavljanja djelatnosti u objektu (ventilacija, dimnjaci, klima uređaji i sl.) moraju se smjestiti unutar osnovnog gabarita objekta, posebno u slučaju kada bi svojim volumenom i oblikom mogli uticati na arhitektonsko - oblikovni izgled fasade;
- nivelaciona kota prizemlja ili suterena u objektima u kojima je predviđen poslovni prostor mora se izvesti najmanje 15.0 - 20.0 cm više od kote niveleta pločnika;
- prizemlja planiranih objekata mogu se rješavati i transparentno uz formiranje pješačkih površina koje po potrebi mogu biti natkrivene;
- planirana spratnost objekata, odnosno njihova maksimalna visina utvrđena je Planom, naznačena u grafičkim prilogima i tekstu i ne može se mijenjati. U ovisnosti od namjene pojedinih dijelova objekata i spratnih visina prizemlja i spratnih etaža može doći do odstupanja predloženih spratnosti, ali maksimalna visina najviših dijelova objekata uz ulicu Zmaja od Bosne ne može biti veća od 50m, odnosno ne može biti veća od 21m kod objekata uz Vilsonovo šetalište;
- na građevinskoj parceli broj 1. objekti mogu biti povezani toplom vezom kroz drugu (2), treću (3) i četvrtu (4) etažu objekata. Maksimalne dimenzije pasaža – tople veze, od kote partera (prizemlja) do drugog sprata iznosi 14.0m x 25.0m, a dimenzije tople veze od 2 (drugog) do 4 (četvrtog) sprata iznose 16.0m x 25.0m,
- kod planiranih poslovno-stambenih objekata moguće je planirati izgradnju stambenog prostora maksimalno do 20% BGP objekta, uz uslov da stambeni prostori objekata budu orijentirani na južnu stranu;
- koeficijenti i procenti izgrađenosti utvrđeni su i prezentirani kroz grafičke priloge i tekstualno obrazloženje Plana;
- na objektima su utvrđene dvije građevinske linije: građevinske linije prizemlja objekta i građevinske linije spratova. Unutar utvrđenih građevinskih linija omogućava se fleksibilnost arhitektonske forme i oblika objekata na drugačiji način, uz poštovanje utvrđenih urbanističko-tehničkih parametara uključujući bruto građevinske površine i visine objekata;



- moguća je realizacija više podzemnih etaža garaže za potrebe saobraćaja u mirovanju, kao i za potrebe poslovnih i komercijalnih sadržaja. Ukoliko investitor ne može obezbijediti adekvatan broj parking mjesta u podzemnim ili nadzemnim etažama objekta, potrebno je adekvatno umanjiti bruto građevinsku površinu objekta, prema normiranim potrebama garažiranja za stambeni i poslovni prostor. Kod realizacije podzemnih garažnih prostora, mora se ispoštovati ozelenjavanje i uređenje nadzemnog dijela koje je utvrđeno Planom, odnosno Idejnim rješenjem hortikulture;
- Planom utvrđene građevinske linije podzemnih etaža garaža, poslovnih i komercijalnih namjena moguće je, zavisno od potrebe potencijalnih investitora povezati sa podzemnim etažama novoplaniranih i postojećih objekta na drugim građevinskim parcelama, ukoliko se vlasnici parcela dogovore i ukoliko postojeći i novoplanirani infrastrukturni sistemi to omogućuju. Sve mjere zaštite moraju biti projektovane i izvedene u skladu sa važećim tehničkim propisima, uslovima i saglasnostima nadležnih komunalnih institucija. Udaljenost građevinske linije podzemnih etaža u odnosu na susjednu parcelu je minimalno 1,5 m zbog mogućnosti realizacije zaštite građevinske jame. Za realizaciju podzemnih etaža neophodan je projekat osiguranja građevinske jame;
- na građevinskoj parceli broj 1. planirane su dvije samostalne podzemne garaže, koje se mogu povezati u jedinstven garažni prostor, uz uslov da se kroz izradu projektne dokumentacije za povezivanje podzemnih etaža (tehnička rješenja) dobiju sve potrebne saglasnosti nadležnih komunalnih institucija (infrastrukturni sistemi);
- ulazno - izlazne rampe za planirane objekte moraju biti realizirane u okviru utvrđenih regulacionih linija građevinskih parcela i preko uređenih kolsko-pješačkih površina koje su utvrđene u grafičkim prilogima Plana i Idejnom rješenju saobraćaja;
- planirane saobraćajnice, neovisno o vlasničkim i posjedovnim odnosima, definišu se kao javne saobraćajne površine namijenjene za snabdijevanje i osiguranje pristupa svim postojećim i planiranim objektima. Podzemne etaže ukoliko se realiziraju ispod trase saobraćajnica, a koje funkcionalno služe kao garažni kapaciteti ili komercijalni prostori, ne mijenjaju status predmetne površine kao javne saobraćajnice. U skladu s tim, predmetna površina se Planom tretira i koristi kao javna površina, što se na jednak način primjenjuje i na korištenje površine koja je planirana kao javni trg;
- kolski saobraćajni pristup u predmetno područje planiran je sa glavne gradske saobraćajnice, ulice Zmaja od Bosne, a ulica Vilsonovo šetalište planirana je isključivo za pješački i biciklistički saobraćaj;
- korištenje i koncept prostornog uređenja za ulicu Vilsonovo šetalište utvrđen je Elaboratom „Uređenje i mogućnost korištenja ulice Vilsonovo šetalište“ („Službene novine Kantona Sarajevo“, broj 29/14).

#### Arhitektonsko oblikovanje:

Pri arhitektonskom oblikovanju i materijalizaciji nove izgradnje, te rekonstrukcije, dogradnje i nadogradnje postojećih objekata predlaže se poštivanje sljedećih uslova:



- kod arhitektonskog oblikovanja objekata birati slobodnije funkcionalno oblikovanje, sa jednostavnim, mirnim arhitektonskim linijama i formom jednostavnih kubusa. Savremeni način tretiranja fasade treba biti sa aspekta forme, kolorita i upotrebe savremenih materijala;
- kod objekata veće spratnosti i volumena preporučuje se smicanje i povlačenje vertikalnog gabarita, a naročito završnih etaža, uz povremeno naglašavanje horizontala, kako bi se izbjegao razvučeni i predimenzionirani volumen objekta kao ulično platno uz ulicu Zmaja od Bosne.

#### **Član 5.**

Uređenje građevinskog zemljišta se mora izvesti u obimu i na način kako je to predviđeno Planom. Izgradnja građevina ne može započeti bez prethodnog minimalnog uređenja građevinskog zemljišta, pod čime se podrazumijeva obezbjeđenje saobraćajnog pristupa parceli, priključenje na vodovodnu, kanalizacionu i elektroenergetsku mrežu.

Izgradnja građevina ne može započeti prije uklanjanja objekata predviđenih za rušenje. Izuzetno, ovi objekti mogu se koristiti za potrebe gradilišta, ali se isti moraju ukloniti prije tehničkog prijema građevine. Privremeno korištenje građevinskog zemljišta koje nije privedeno krajnjoj namjeni se ne može odobriti.

#### **Član 6.**

Na postojećim objektima može se izvršiti rekonstrukcija, dogradnja, nadogradnja ili izvršiti zamjena građevinskog fonda samo u okviru Planom utvrđenih spratnosti objekata i građevinskih linija utvrđenim Planom.

#### **Član 7.**

Na postojećim objektima koji su predviđeni za rušenje mogu se odobriti samo radovi tekućeg održavanja.

#### **Član 8.**

U poslovnim prostorima mogu se obavljati sve djelatnosti koje ne ugrožavaju prirodnu sredinu i okoliš, ne remete korištenje susjednih objekata i sadržaja i koje se vrše u objektima izgrađenim u skladu sa važećim propisima u odnosu na djelatnost koja se u njima vrši.

#### **Član 9.**

Ograde se mogu postavljati isključivo uz diplomatsko-konzularna predstavništva, uz uslov da izgradnja pune betonske ograde prema Vilsonovom šetalištu nije dozvoljena, odnosno ograda mora biti transparentna.



## Član 10.

Saobraćajne površine, površine za parkiranje i garažiranje vozila utvrđene su Planom - faza saobraćaja.

Prilikom izdavanja urbanističke saglasnosti, a na osnovu tražene bruto građevinske površine i namjene objekta, neophodno je odrediti broj parking - garažnih mjesta i to na sljedeći način:

- za stambenu izgradnju 1 stan – 1,1 parking mjesto,
- za poslovne sadržaje jedno parking mjesto na 60 m<sup>2</sup> / BGP

Unutar saobraćajnog ugla preglednosti ne mogu se postavljati ograde, vršiti sadnja visokog zelenila ili graditi druge fizičke strukture.

## Član 11.

Uređene zelene površine se javljaju kao jedan od ravnopravnih sadržaja u obuhvatu plana i formiraju se na način zadovoljavanja svih ekosistemskih funkcija zelenila.

Planom je predviđeno da se u granicama parcela objekata formira 10-20% zelene površine, a ukoliko za to postoje prostorne mogućnosti.

Ovim Planom utvrđene su sljedeće kategorije zelenila:

1. zelenilo u zoni društvene infrastrukture
2. zelenilo u stambeno-poslovnoj i poslovnoj zoni
3. javne otvorene i zelene površine
4. linijski sistemi zelenila

Površine utvrđene kao neke od ovih kategorija ne mogu se koristiti za druge namjene, niti se mogu graditi objekti koji nisu u skladu sa funkcijom koju ta kategorija zelenila treba da ostvari.

U zonama zelenila može se odobriti izgradnja pješačkih staza sa urbanim mobilijarom. Planirani trg na građevinskoj parceli broj 1, kao i trg na sjevernom dijelu obuhvata uz ulicu Zmaja od Bosne, moraju se oblikovati i urediti kao jedinstvena i jasno definirana prostorna cjelina. Prostor se organizira kroz jedinstveno i funkcionalno oblikovno rješenje sa uravnoteženim odnosom zelenih i popločanih površina, kojim se obezbjeđuju uslovi za svakodnevno korištenje, boravak korisnika i održavanje javnih manifestacija.

Projektna dokumentacija za izgradnju objekata mora sadržavati i Projekte vanjskog uređenja sa hortikulturom, kao dio jedinstvenog rješenja.

Tehnički prijem arhitektonskih i drugih objekata podrazumijeva i prijem izvedenih radova vanjskog uređenja sa hortikulturom.

## Član 12.

Sistem upravljanja otpadom u obuhvatu Plana mora funkcionirati u skladu sa odredbama Zakona o komunalnoj čistoći („Službene novine Kantona Sarajevo“, br. 14/16, 34/16, 19/17, 20/18 i 22/19), kao i drugim zakonskim i podzakonskim aktima iz predmetne oblasti.



Na grafičkom prilogu Idejnog rješenja „Upravljanje otpadom“ dat je prijedlog lokacija za selektivno prikupljanje otpada. Eventualnu izmjenu lokacija, vrste/broja/zapremine posuda za prikupljanje, potrebno je odrediti u dogovoru sa nadležnom općinskom službom i KJKP „Rad“ Sarajevo.

Lokacije za prikupljanje otpada riješiti u okviru planiranih parcela za izgradnju objekata ili unutar planiranih objekata, te iste adekvatno obraditi i prikazati u projektnoj dokumentaciji za izdavanje urbanističke saglasnosti.

### **Član 13.**

Uslovi za sklanjanje stanovništva i materijalnih dobara moraju biti obezbijeđeni u skladu sa odredbama Zakona o zaštiti i spašavanju ljudi i materijalnih dobara od prirodnih i drugih nesreća („Službene novine Federacije BiH“, br. 39/03, 22/06 i 43/10) i odredbama Uredbe o mjerilima, kriterijima i načinu izgradnje skloništa i tehničkim normativima za kontrolu ispravnosti skloništa („Službene novine Federacije BiH“, broj 21/05 i 99/07).

### **Član 14.**

U postupku donošenja urbanističke saglasnosti i odobrenja za građenje, nivelete pješačkih saobraćajnica, kao i prilazi i ulazi u građevine, moraju biti isprojektovani i izvedeni prema Uredbi o urbanističko-tehničkim uslovima, prostornim standardima i normativima za otklanjanje i sprečavanje stvaranja arhitektonsko-urbanističkih barijera za kretanje invalidnih lica koja koriste tehnička i ortopedska pomagala („Službene novine Kantona Sarajevo“, broj 5/00);

### **Član 15.**

Projektna dokumentacija za realizaciju novih objekata mora biti u saglasnosti sa preporukama vezanim za konstruktivne elemente građevina i radova na okolnom terenu na osnovu inženjersko-geološkog i geotehničkog izvještaja, koji treba biti urađen od strane ovlaštene firme ili institucije.

Statički proračun građevina mora se dimenzionirati za potrebe najmanje 8<sup>o</sup> MCS.

Obim i kvalitet izvedenih radova vezanih za geoinženjerske uslove moraju biti verifikovani u okviru tehničkog prijema, a upotrebna dozvola se ne može izdati ukoliko predviđeni radovi nisu u obimu i kvalitetu zadovoljavajući.

### **Član 16.**

Ovom Odlukom stavlja se van snage Odluka o provođenju Regulacionog plana „Kvadrant C – Marijin Dvor“ („Službene novine Kantona Sarajevo“, br. 27/03, 26/05 i 14/11).





## **Član 17.**

Ova Odluka stupa na snagu narednog dana od dana objavljivanja u „Službenim novinama Kantona Sarajevo“.

**PREDSJEDAVAJUĆI GRADSKOG VIJEĆA**

**Alen Girt**

**Broj:**  
**Sarajevo, \_\_.\_\_.2026. godine**





## OBRAZLOŽENJE

### Pravni osnov

Pravni osnov za donošenje ove odluke sadržan je u odredbama člana 3. Zakona o izmjenama i dopunama Zakona o prostornom uređenju Kantona Sarajevo („Službene novine Kantona Sarajevo“, broj 1/18), a u skladu sa članom 177. kojim je propisano da Skupština Kantona, gradsko ili općinsko vijeće koji su donijeli odluku o pristupanju izradi planskog dokumenta do dana 30.06.2017. donose i odluku o usvajanju i odluku o provođenju tog planskog dokumenta.

Statutarni osnov su odredbe člana 18. stav (1) tačka d) i člana 31. stav (1) tačka b) Statuta Grada Sarajeva („Službene novine Kantona Sarajevo“, broj 7/23) kojim je regulisano da je vlastita nadležnost Grada Sarajeva utvrđivanje i provođenje politike planiranja i uređenja prostora i zaštite okoliša na teritoriji Grada Sarajeva, odnosno da Gradsko vijeće Grada Sarajeva donosi odluke, druge propise i opće akte i daje njihovo tumačenje.

### Planski osnov

Planski osnov za donošenje ove Odluke je Prostorni plan Kantona Sarajevo za period 2003. do 2023. godine („Službene novine Kantona Sarajevo“, br. 26/06 i 22/17) i Urbanistički plan grada Sarajeva za urbano područje Sarajevo (Stari Grad, Centar, Novo Sarajevo, Novi Grad, Ilidža i Vogošća) za period 1986. do 2015. godine („Službene novine Kantona Sarajevo“, br. 5/99, 14/00 i 4/02 i 37/14).

### Razlozi donošenja Odluke

Osnovni cilj izrade plana je urbanizacija gradske jezgre Sarajeva kao primarnog centra kome gravitira cjelokupno stanovništvo grada i regije, preispitivanje prostorne organizacije predmetnog kvadranta unutar gradske jezgre i stvaranje uvjeta za njegovu valorizaciju i podizanje urbanog standarda, kao i kvalitete života, oplemenjivanjem istog, u prvom redu sadržajima društvene infrastrukture, primarno kulturne djelatnosti, poslovanja, diplomatsko-konzularnih predstavništva, kao i javnih i zelenih prostora za okupljanje građana.

### Obrazloženje predloženih rješenja

Članom 1. utvrđuju se uslovi korištenja, izgradnje, uređenja, zaštite prostora i način provođenja Plana.

Članom 2. utvrđuju se granice i površina prostornog obuhvata Plana.

Članom 3. definiraju se zone sa namjenama površina u obuhvatu Plana.

Članom 4. definiraju se urbanističko tehnički uslovi za izgradnju građevina

Članom 5. propisuju se uslovi za uređenje građevinskog zemljišta

Članom 6. i 7. definiraju se odnosi prema postojećim objektima

Članom 8. propisuju se uslovi za obavljanje djelatnosti u poslovnim prostorima

Članom 9. propisuju se uslovi za postavljanje ograda

Članom 10. definiraju se saobraćajne površine, površine za parkiranje i garažiranje

Članom 11. propisuju se uslovi za uređenje zelenih i slobodnih površina

Članom 12. definira se sistem upravljanja otpadom u obuhvatu Plana

Članom 13. propisuju se mjere zaštite stanovnika i materijalnih dobara od prirodnih i drugih nesreća



Članom 14. propisuju se mjere zaštite prava lica sa smanjenim tjelesnim sposobnostima

Članom 15. propisuju se uslovi zatemeljenje i statički proračun planiranih građevina

Članom 16. propisuje se da prestaje da važi Odluka o provođenju RP „Kvadrant C – Marijin Dvor“ („Službene novine Kantona Sarajeva“, br. 27/03, 26/05 i 14/11)

Članom 17. propisuje se način stupanja na snagu Odluke.